




Accompagnament en temps da cumiau e malencurada

A Glion ella Casa Sentupada dat ei cul «Trauercafé» ina nova purschida



Sora Madlen: «Malencurada ei la reacziun sin ina sperdita che tucca il carstgaun en tut siu esser.» Il café da malencurada accompagna pertuccai durant quei process.

MAD

DA SUSI ROTHMUND / ANR

■ **Tochen tier la mort vegnan malsauns e moribunds pil solit accompignai e susteni fetg bein. Suenter la mort d'ina persuna carezada maunca il support denton savens ed ils pertuccai ein persuls. Perquei ha sora Madlen Büttler dalla claustra a Glion lantschau ina nova purschida: Il «Trauercafé» ella Casa Sentupada.** La malencurada ha pliras fatschas. Ella semuossa tier la sperdita d'ina piazza, sch'enzatgi piarda la sanadad, tier separaziuns e buc il davos tier la sperdita d'in carstgaun carezau entras

malsogna e mort. Ils confamiliars vegnan accompignai tochen tier la mort d'in commember da famiglia. Suenter restan ei savens anavos persuls. «Mo nua ir cun tut quels sentiments, cun tut ils patrats e tut quei ch'ins vul discutir surlunder?», sedamonda sora *Madlen Büttler* en in communicau als mieds da massa. Culla nova purschida «il café da cordoli» ch'ei vegnius lantschau igl october ella Casa Sentupada dalla cvlaustra a Glion rispunda ella gest sezza quella damonda.

Parter la malencurada

Tochen dacheu deva ei ella regiun Surselva negina purschida d'accompignament per carstgauns ch'han piars enzatgi ni enzatgei ed ein en malencurada. Cul «Trauercafé Surselva» vegn quella largia serrada. Tenor sora Madlen prestan ils voluntaris dall'«Uniun Tecum per accompignament ella davosa fasa dalla veta» grondiusa lavur. Els accompognan ils moribunds e lur confamiliars. Culla mort ei quell'impurtonta lavur denton terminada. Anavos restan confamiliars, amitgs e parents. «Cheu muncava tochen dacheu



ina purschida pil temps suenter la mort», di sora Madlen dalla Casa Sentupada. Ina munconza ch'ella hagi vuliu remediar. Perquei hagi ella absolviu duront dus onns ina scolaziun sco accumpignadra da malencurada. Gia dapi l'entschatta da sia scolaziun haveva ella ina clara finamira, numnadamein da realisar il «café da cordoli» e da porscher discuors persunals. Ei dueigi esser in liug nua ch'ei vegn purschiu als carstgauns temps e spazi per raquintar da lur sperditas e dil cordoli. Ei dueigi era esser in liug nua ch'els carstgauns vegnan accumpignai e sentan ch'els vegnan buca laschai persuls cun tut lur sentiments e patratgs.

Scuvier novas fontaunas da forza

«Nus essan fetg cuntents che nus havein saviu lantschar quest meins il 'Trauercafé'. Nus, quei essan *Barbara De Giorgi*, specialista per damondas da veta e malencurada en scolaziun, ed jeu», declara sora Madlen. Il «Trauercafé» porscha in ambient schurmegiau nua che persunas en malencurada vegnan accumpignadas e san raquintar da lur temas e quitaus. Suenter ina cuorta runda da sepresentar nezegian las accumpignadras rituals per tschaffar si tut quei che las participontas ed ils participonts portan ella runda. Cun agid da quels rituals san ils participonts anflar novas fuormas da s'exprimer, per ir entuorn cun lur sentiments, per exprimer els e la finfinala puspei schar liber els. Cul spazi che vegn aschia libers scuffeschian ei era novas fontaunas da forza el mintgadi. «Gest il meins dallas olmas november muossa fetg bein a nus tgei forza che schai ellas traversadas, gie gest en las midadas. La natira seretila per ruassar sur unviern per la finfinala sedestadar la primavera a nova veta.» Tenor sora Madlen gidi ei da discuorer dallas sperditas e dalla malencurada ed il «Trauercafé Surselva» detti sustegn per rimnar novas forzas.

www.hausderbegegnung.ch

«Trauercafé Surselva» – terminis:

Il proxim «Trauercafé» ha liug mesjamna, ils 6 da november 2019 dallas 14.00–16.00 ella Casa Sentupada a Glion. Ulteriurs terminis: 4 da december 2019, 8 da schaner 2020, 5 da fevrer 2020, 11 da mars 2020, 15 d'avrel 2020, 6 da matg 2020, 10 da zercladur 2020, 9 da settember 2020, 14 d'october 2020, 11 da november 2020 ed ils 9 da december 2020.